

# 2 Timoti

## *Sepinien xa diamu te 2 Timoti*

### **Visi tetis uvei ak?**

Pol tetis sepinien ak e haram xa tehe sangas ni 67 AD xa tehe sepinien kor nan. Melele xa tetis sepinien tetiamu teha mi Timoti xal Taetas, di tesao ni vanut Kristin xil e taon holu. E melele xa tehe Rom, latetel xati e lateso ni tehe nim te xeih (1:8,16). Xi telonge tesa, e neta sav xa temak, neketen nan di tamu texeih (1:12). Misak ni, tetis uvei tei mun teha mi Timoti tehit imei isao ni vatei mun. Ti, xi iha imat sung e he mol-Rom xil (4:9-13).

### **Visi iaxa tevuli uvei ak tetiamu?**

Pol tetis uvei ak teha mi Timoti (1:2), e en tehei ngan xil te sias tahal Efeses mun lilonge (4:22). Sepinien xa Diamu te 1 Timoti di bit kila xa Timoti tehe visi.

### **Pol tetis uvei ak veneh?**

**Pol en tehei vapus rilomun ni Timoti** - Pol tekila xa navehi ti lihasi imat (4:6-8), misak ni bit vapus rilomun ni Timoti, iti, imat sung e he mol-Rom xil (1:4; 4:9,21).

**Pol en tehei vasel xat Timoti ve melele xil xa nggeih di bemei** - Pol tepus kila xa melele xil xa nggeih di bemei, misak ni en tehei tangan Kristin xil lisoh ixeih e neketen nae (1:8; 2:3).

**Pol en tehei vasel xat Timoti tangan vaxuxou kuhi ve pispisien nan xil** - Pol tesis Timoti tangan vaxuxou kuhi ve pispisien nan melele xa di misetu ni sepinien na Hi (1:14), e itit ni ngan xa ti ihit rat longeongen hos na Hi mi moletin xil (3:14; 4:2).

**Pol en tehei vasel xat Timoti vatei mun usil moletin xil te luvosen** - Moletin xil te luvosen lateti tamu visal Timoti, ma Pol tesel xat rilomun ni tangan nahusil xat xil ti e nangor ti natel xil (2:16-26).

**Vatit nenemien tei te uvei ak de 2 Timoti 2:15**

*Mak ma, xouk, Timoti, upol imal melele xa di opisipi ni sepinien te reitinen na Hi mi moletin xil. Mak ma, ukila usoh ixeh pe met Hi ixoni moletin te polien tei xa tave unoun ti ni polien nan.*

**Vatit nenemien tei mun te uvei ak de 2 Timoti 3:16-17**

*Sepinien xil vus xa di Vanuvei Eo, nenemien xil vus teni nggo Hi. Sepinien xil ak bos te pispisien, te selxatien, te sepkilaen usil suse xa momal, e te pispisi mi moletin xil tangan linapol ni ti mun sexien xil xa misa. Nggo sexien xil ak, Vanuvei Eo di misak xat moletin xil na Hi tangan likila lipol vuol ni polien hos xil vus.*

**Naha de uvei ak?**

1. Pispisien xil usil ngan xil xa di langgur polien na Hi (1:1-2:26)
  2. Selxatien ba mi Kristin xil tangan lisoh ixeh ve melele xil xa nggeih di bemei (3:1-4:22)
- 

**1** <sup>1</sup>Inou Pol iaxa nadis uvei ak. Inou nabe eloheoh tei na Iesu Kristo nggusil nenemien na Hi xa bit xati xa isa meulien sal mi ngan xil xa di laling neketen nae e Iesu Kristo.

<sup>2</sup>Nadis minuk Timoti xa onggoni natuxuli hos tei. Nasis tangan eheien, esaen, e tomat na Hi Tamer e na Iesu Kristo xa be Suv nar iti e meulien nam.

**Pol Misel Xat Timoti tangan Ital Xat Kuh Polien xa Hi Misa ni Mini**

<sup>3</sup>Timoti, e vongien e melengien, ieok di tabovorong ni xouk ti e sisen xil navan e di names Hi ve xouk. Hi ak iaxa di nanggusil xati, nggoni ngan xa avu navan xil tetiamu di latepol ni, e nakila namusil xati nggo sexien xa nakila nabit momal pe meten. <sup>4</sup>Nanem xat simetom xa temereh melele xa rutetasil, e ieok bei tangan nipusuk rilomun e isak ni nou nipolu ni sien. <sup>5</sup>Nanem xat neketen hos nam xa be reitin. Neketen ak nggoni neketen hos na avu nam Loes e na ninom Iunis. E nakila xa de xouk mun. <sup>6</sup>Ve rin ak nasel xatuk tangan utit ni ti upol itel sanien xa Hi tesa ni minuk melele xa natetuxol xatuk. Sanien ak nggoni upang na Hi e meulien nam e bos xa uhui xati tangan ileluv mei ihe eilep mu. <sup>7</sup>Upol ixeh vengan Ninin Eo xa Hi tesa ni mi xir misak ni ulixir takan ti. Ninin Eo nan pol ni xir rapol vituei del xeihen nan, tangan eheien nar iti e mosav e mikila raxuxou kuhi ve sexien nar xil.

<sup>8</sup>Mak ma, onahe unoun ti tangan ovit rat sepinien xil usil Iesu xa be Suv nar. E onahe unoun ni nou ti mun xa nade nim te xeih vengan inou nabe moletin na Iesu. !E-e! Itel xeihen xa Hi misa ni minuk, xouk mun uhusil suse te longpangisien ixoni nou ve longgeongon hos usil Iesu. <sup>9</sup>Hi

mileh rerat xir ra tesaen e misa meulien hu mi xir. Xi mikes xir tangan mei rave moletin nan, e tave ti ve naha xa xir di rapol ni. !E-e! Xi pol ni mak nggusil nenemien nan e ve eheien hos nan mi xir. Tetiamu ni melele xa Hi tepeas ni ut etan, xi tehiti xati xa xi isa Iesu mei ihe suse tangan isak ni eheien hos nan mei istal mi xir. <sup>10</sup>E xosali, hitxatien nan mei mistal be reitin e melele xa Iesu Kristo teme e ut etan e teteh meulien e xir. Xi bas tan ni xeihen te maten, e longeongen hos teni pisen suse te meulien hu mi xir.

<sup>11</sup>Ma vengani Hi ien bei tangan longeongen hos ak ihe ut xil vus, xi tehosei nou mei nabe eloheoh nan tangan nihiti rati mi moletin xil vus e nipispisi ni reitinen nan mi xil. <sup>12</sup>Ma ve rin ak, iaxa inou di nalong pangas nou ven e nim te xeih ak. Inou natanexo ti vengani nakil kuh ngan xa inou naling nenesien navan da en. E nakil kuhi xa xi nggur xeihen pipin tangan isikoe xol naha xa xi milingi e heok tangan ti nipol ni ituxoh melele Iesu itilomun en. <sup>13</sup>Xouk mun utal xat kuh sepini te reitinen xa natepisi ni minuk ngamu. Holesok xil xa otepus nou natepol ni e otelong nou natehiteni, xouk mun upol ni. E utal xat sexien xil te neketen e eheien ixoni ngan xil xa di langgusil xat Iesu Kristo. <sup>14</sup>Longeongen hos xa onguri be neta ngan xa bos pupu. Misak ni, uketeh xole e uxuxou ven ihos itel tutouen na Ninin Eo xa de xir.

<sup>15</sup>Xouk otelong kila xa tua navan xil e provins tahal Esia, nggoni Fukelas xal Hemonggenes, xil vus latetasil reling nou ngamu. <sup>16</sup>Onesiforas, xi kestang bemei visal nou e melele nen xil ak, e di pet rat nenemien navan. Nasis Hi tangan isa hosien mini itel ngenen xil vengani xa xi tave unoun ti tangan mei vasao ni nou e nim te xeih ak. <sup>17</sup>Io, melele xa tetuxoh taon xa eilep tahal Rom xi telang ni nou ba vuma tekamete rute xa inou nada en. <sup>18</sup>E melele sav mun xa di natepol e taon tahal Efeses, xouk okil kuhi mak xa xi tetutou ni nou tehe holu. Misak ni, di nasis tangan Suv Iesu ipisen esaen mini e melele xa xi imei rilomun en e ilepis moletin xil.

### Pol Misel Xat Timoti tangan Isoh Ixeih e Neketen Nan

**2** <sup>1</sup>Timoti, natuxuli, usoh ixehi itel tutouen xa Iesu Kristo di misa ni mi xir. <sup>2</sup>Pispisien xil xa otelong nou natehiteni mi moletin xil, xouk uhuri e ha upispisi ni mi ngan xil xa nenesien nam di e xil. Mak ma, xil mun likila lipispisi ni mi mosav xil.

<sup>3</sup>Melele xa saksipisien xil di bemei, xouk usoh ixehi ixoni moletin hos tei te vaeen na Iesu Kristo. <sup>4</sup>Melele xa moletin tei te vaeen di pol, xi di tamaen ni ti holesok xil te ut etan tangan valihi nenemien nan ra polien nan vengani ien bei tangan suv nan vamaal ven. <sup>5</sup>Xouk onggoni moletin te lohen mun. Moletin ak iloh ihusil rae xil te lohen. Xosxa xi tahusil rae xil vus ti, xi misakras vahur huite teni. <sup>6</sup>Xouk onggoni moletin te naho

mun. Vengan moletin xa nggur vetin e naho san, momal tang tangan xi ihur anien en itiamu ni mosav xil. <sup>7</sup>Bos xa unem xat vole xatel ak xa nabiteni minuk, e Hi Suv isak ni xouk ukil kuh koute te xatel.

<sup>8</sup>Unem xat Iesu Kristo: xa temeul rilomun ra maten e xa testal texo ra na suv toto Deved. Ngan ak be vatit longeongen hos xa di nabit rati. <sup>9</sup>Ve longeongen hos ak, inou di nanggur longpangasien e labar xat nou ni sen e nim te xeih ak nggoni moletin tei te kanen. E sepinien na Hi, lasakras lavar xati. <sup>10</sup>Ve rin ak, namaen nou tangan nihur longpangasien xil ak. Vengan nakila xa melele xa nabit rat longeongen hos mi moletin xil, ngan xil xa Hi tehosei xil, likila lihur meulien hu xa mistal nggo Iesu Kristo. Mak ma, xil likila liti e miehen itela vehakut. <sup>11</sup>Usil nenemien ak, sepinien ak be reitin xa biteni bit:

Xosxa ratemat tetel Iesu Kristo,  
ma rimeul itela.

<sup>12</sup>Xosxa risoh ixeh ve hisen,  
ma xir rikila rilaxat ut xil e ut etan itela.  
E xosxa rihiteni rihit ratakil ti xi,  
ma xi mun ihiteni ihit takil ti xir.

<sup>13</sup>E tave ti neta xosxa rimot e neketen nar,  
e xi misakras vastokovein xir,  
vengan xi misakras vapol ni misav  
ni sexien nan xati xa momal tevi.

### Moletin te Polien Hos na Iesu Kristo

<sup>14</sup>Bos tangan vehakut ti upispisi mi moletin xil ni pispisien xil ak. Usel xat xil e his Hi tangan linanggor ti ve koute te mavulut sepinien xil vus. Sexien ak misakras vapol ni ti neta vahos. Sexien xil ak di purun moletin xil xa di lalonge. <sup>15</sup>Mak ma, Timoti, ti usak pisi tangan upispisi ni sepinien te reitinen na Hi mi moletin xil. Mak ma, ukila usoh ixeh be met Hi ixoni moletin te polien tei xa tave unoun ti ni polien nan. <sup>16</sup>E onamos ti natel ngan xil xa sepinien nae be neta sav tang e tamal ti. Vengan xa hisit sepinien xil ak di midel moletin xil labe sotin mak mu ra Hi e sexien hos xa ien bei xil lavusili. <sup>17</sup>Ve naha xa di lasep usili mikapis mi moletin xil, e di purun nenemien nae. Sepinien nae nggoni menuk tei xa bo xa mistal e moletin, e ngga purun tenben xil vus. Moletin lu xa lumak lube Haemeneas e Faelitas. <sup>18</sup>Xalu di lupispisi ni mi moletin xil lubit mea rilomunen ra maten mistal ngamu. Mak ma, xalu di lupurun neketen na moletin sav xil e di lupisen ni xa lule ras suse te reitinen. <sup>19</sup>E tave ti neta xa di lupol ni mak, sepinien na Hi di tamu misoh nggeih nggoni simen te nim tei xa lakili ni be tan. Vengan xa xi biteni mak bit, *“Hi suv mikil kuh ngenen xil.”* (Namba 16:5) E biteni mun bit, *“Ngan xil xa labit lavusil Hi Suv listokovein sexien tesa nae xil.”* (Aes 52:11)

<sup>20</sup>Sias na Hi nggoni nim tei xa eilep xa tre xil e plet xil holu di en. Rut tre ngan xil, lapol kuhi ni ni neta xil xa minehin, nggoni silva e gol; e rute xil mun, lapol ni ni liei e tan xa pili. Ngan xil xa bos pupu, laserevi datil polien hos tei; e ngan xil xa tavos pupu ti, dit lapol ni muis ba en. <sup>21</sup>Usil nenemien ak, xosxa moletin tei pol ni xi mese ra hisit sepinien tesa xil xa nasep usili, Hi ise revu ve polien hos xa tehosei ven. E vengan xa xi misa meulien nan mi Hi e misak xat kuh xi bos ve polien, Hi xa be Suv te Sias ihur xati e ipol ni polien hos xil ixo en. <sup>22</sup>Mak ma, Timoti, bos tangan uling sexien tesa xil xa tiram maxoe sav xil di langgusili. !Io! Xouk itel ngan xil xa di mumot mi Hi del nenemien hos, bos xa muloh ve sexien xil xa Hi ien bei nggoni momalen, neketen, eheien, itel tomat. <sup>23</sup>Uhe reling ngan xil xa di lasep talang ve holesok xil xa be neta sav tang, vengan hisit sepinien xil xa mak di pol ni ngongoren xil tang. <sup>24</sup>E vengan xa xouk obe moletin te polien na Hi, onangor ti natel moletin sav xil. Xouk uhos mi moletin xil vus e upispisi kuhi mi xil. Bos tangan utal xat nenemien nam tangan iem nakat ti namanon. <sup>25</sup>Ngan xil xa di laseputut ni xouk, xouk upispisi mi xil itel sexien te merouen. Xos Hi isak ni xil lihiles ra tesaen nae xil e mei likil reitinen nan. <sup>26</sup>Mak ma, xil mei lihur nenemien xa bos e lilesae ra voh xa Temat di boxol xil en. Temat di dal xat xil vengan ien bei tangan lapol vahusil nenemien nan.

### Selxatien usil Naha xa Istal e Melengien Xil te Vongkor

**3** <sup>1</sup>Timoti, bos xa ukil kuhi xa, e melengien xil te Vongkor, sakpisien xil holu limei. <sup>2</sup>Vengan e melengien xil ak, moletin xil linem kes ni xil tang: nenemien nae iti e mani, lisep xoli xil e lihe koae. Xil lipurun mosav xil e linalong xat ti tame xil. Xil linem mele ni tutouen xil xa mosav xil lasa ni e linem mele ni holesok xil na Hi. <sup>3</sup>E melele nen ak, xil linanem ti meulien na mosav xil, esaen nae ihe tovuol. Xil ti lisuhol purun mosav xil e lipol ni vaeen mi xil. Iexil ikat vehakut e liketeh isa ni holesok xil xa bos. <sup>4</sup>Xil ti lipol ni suse tangan ti lipurun mosav xil e linanem ti meulien nae mu na mosav. Xil lipolu ni nenemien te molepen e eheien nae iti e sien xil te ut etan, e nati ti e Hi. <sup>5</sup>Xil ti lihusil Hi ixot hilibexil tang, e xeihen nan tovuol e meulien nae. !Hisit moletin xil xa lamak, onaha ti visal xil! <sup>6</sup>Rut moletin xil ak di lakapis e nim xil vus e di lasep luvos atou xil xa nenemien nae taxeih ti tangan lavusil pispisien nae. Atou xil ak, eheien te holesok xil te ut etan di del xil, e nenemien usil tesaen nae xil di bas tan ni xil vehakut. <sup>7</sup>E tave ti neta xa hisit atou xil ak di langgur pispisien xil vehakut, lasakras lakil ti reitinen teni. <sup>8</sup>Xosali ak, moletin xil holu di lasep misa ba ni longongen hos na Hi. Nenemien nae tamal ti e neketen nae be te luvosen tang. Xosali nggoni tetiamu, e melele xa provet te luvosen lu na suv toto tahal Isip lutesepin tesa teha mi Mosis, hisealu tehe Sanes e Sampres.<sup>a</sup> <sup>9</sup>E nggoni provet te luvosien

<sup>a</sup> 3:8 Eks 7:11-13

xalu ak, polien nae xil mei ihe neta sav tang vengan moletin xil vus lipus kila xa xil dit lapol ni unuen.

### Selxatien mi Timoti tangan Ihusil Kuh Sepinien na Hi

<sup>10</sup>E xouk, Timoti, okil kuh pispisien xil navan e sexien navan xil. Okil kuh vatit nenemien xa di napol nggusili. E okil kuh neketen navan, eheien navan, e nenemien navan xa teviei. Okila mun xa inou natangel ti e polien navan. <sup>11</sup>Xouk okil kuh sакpisien e longpangasien xil xa natehisu ni e taon xatel ak: Antiok, Aekoniam e Listra.<sup>b</sup> Sакpisien xil ak tehe holu pupu, e Hi tesikoe xol meulien navan ra xil vus. <sup>12</sup>Io, moletin xil vus xa iexil bei tangan lavusil Iesu Kristo e suse xil xa momal na Hi, xil lihur sакpisien e longpangasien xil ven. <sup>13</sup>E moletin xil xa lasa e ngan xil xa di laluvos, xil mei lisa pilei sung. Xil ti liluvos mosav xil, e mosav xil mun ti liluvos xil. <sup>14</sup>E xouk Timoti, onaxoni xil ti, utit ni ngan taxa ti uhusil pispisien xil xa otehuri tetiamu e okila ngamu xa be reitin. Okil kuh hisit pispisien xil xa otehuri ra moletin xil xa nenesien nam di e xil. <sup>15</sup>E okil kuhi xa hisit pispisien xil ak di nggusil naha xa otelonge texo Vanuvei Eo e melele xa otehe horamue tamu mei duxoh xosali. Vanuvei Eo mikila vasak ni moletin xil lale kil suse xa lakila laling neketen nae e Iesu Kristo e lavur meulien hu vaxo en. <sup>16</sup>Sepinien xil vus xa di Vanuvei Eo, nenemien xil vus teni nggo Hi. Sepinien xil ak bos te pispisien, te selxatien, te sepkilaen usil suse xa momal, e te pispisi mi moletin xil tangan linapol ni ti mun sexien xil xa misa. <sup>17</sup>Nggo sexien xil ak, Vanuvei Eo di misak xat moletin xil na Hi tangan likila lipol vuol ni polien hos xil vus.

### Pol Misel Xat Timoti Tangan Ihithiten Sepinien Na Hi

**4** <sup>1</sup>Timoti, Iesu Kristo itilomun e mei ihe suv toto. Mak ma, pe met Hi e pe met Iesu Kristo xa ilepis moletin xil xa lameul e ngan xil xa lalel, inou nasa selxatien xil ak minuk. <sup>2</sup>Uti ni ngan taxa ti uhit rat longeongen hos na Hi. E melele xa bos, e melele xa nggeih mun, usak xatuk ven. Mi ngan xil xa latakil ti Hi, usak ni xil like reitin en. Mi ngan xil xa di lapol ni tesaen, usel xat xil ni. E mi ngan xil xa di lalonge misa, upet rat nenemien nae ni. E uti ni ngan taxa ti upol ni sexien xil ak itel pispisien hos xil. <sup>3</sup>E melengien xil xa ti imei, moletin xil iexil ti navei lalong pispisien hos te reitinen. !Io! Xil lihusil naha kestang xa iexil bei. Ma lileh viton tisa xil mei liti xorelis xil tangan lisa pispisien xil xa iexil bei tangan ti lilonge. <sup>4</sup>Xil lihiles ra sepinien te reitinen e lilong xat pispisien xil usil tumulen te luvosen xil. <sup>5</sup>E xouk, Timoti, uxuxou kuhi ve sexien nam xil. Usoh ixeh e longpangasien xil nam, uhit rat longeongen hos vehakut, e upol ni holesok xil vus xa Hi milingi e hem.

<sup>b</sup> 3:11 Pol 13:44-14:23

<sup>6</sup>Nasel xatuk nggeih mak vengán inou, meulien navan sangas vavus nggoni sanien kor navan ba mi Hi. Navehi ti, nihe reling ut etan. <sup>7</sup>Inou nanggoni moletin tei te vaeen e natevae texeih e rin na Iesu Kristo. E nanggoni moletin te lohen mun, xa natenagel ti e lohen te neketen. E taxeak, naduxol xoxalite teni ngamu. Natesoh texeih e neketen navan. <sup>8</sup>Ma taxeak, huit lohen navan datil nou e ut nesao vengán xa nanggusil naha xa Suv ien bei. Xi xa momal isa huit ak minou e melengien xa mei ilepis moletin xil en. E nave nou ti kestang, xi isa huit e mun mi moletin xil vus xa iexil bei pupu tengán lipus meien nan.

### Pol Misis Timoti tengán Vatemanon Vamei Visali

<sup>9</sup>Timoti, usak pisi li utemanon mei upus nou inggak. <sup>10</sup>Nasisuk tengán omei vengán xa Kresken ba ngamu pol e provins tahal Kalesia, e Taetas mun ba ngamu pol e taon tahal Dalmesia. E Dimas, xa eheien nan di e holesok xil te ut etan, xi milesae ra nou e be taon tahal Tesalonaeka. <sup>11</sup>Luk kestang be xamel madi. Mak ma, uhur Mak ihe xamil, vengán xi mikila itutou ni nou e polien navan ixoni ngán xa tepol ni tetiamu. <sup>12</sup>Nasil Tikikas di bat ni xamil e taon tahal Efeses. <sup>13</sup>E melele xa umei, bos tengán uhur kot navan xa natelingi tete he Karpas xa de taon tahal Troas. E uleh vanuvei navan xil, e ngán xa eilep mak mu, uleh tisen navan xil itel xat xamil.

<sup>14</sup>Aleksanda xa di pol ni holesok xil ni aean, xi purun pupu ni nou. E Suv Iesu isa rilomun ni naha xa tepol ni minou ihe an. <sup>15</sup>U laxatuk ve moletin ak, vengán xi di bae pupu ba ni longeongen hos xa xir di rabithiteni.

<sup>16</sup>Melele xa latehur kokot ni nou natehe kot, moletin tovuol mei vasoh e rin navan tengán vatutou ni nou ni sepinien. Xil vus latelesae reling nou. E natesis Hi tengán naketeh ti nasa mi xil ve rin ak. <sup>17</sup>E Suv iaxa tesoh e rin navan e tesa xeihen minou. Xi tesak ni nou natesepin kuhi ni longeongen hos nan tengán ngán xil xa latave Siu ti lakila lalonge. Xil sangas lasemae ni tengán lavas vin nou, e Hi tesikoe xol nou ra xil. <sup>18</sup>E Hi isikoe xol nou ra he ngán xil vus xa lasa xa labit ti lapurun nou. E xi ihur kuh nou tengán ha nite metimal nan xa eilep xa de ut nesao. Ripetrat his Hi ihe nesao e ita vehakut. Reitin.

### Sepinien Kor

<sup>19</sup>Nabit bos makoe mi Prisila del tiramue nan, Akuila. Nabit bos makoe mun mi Onesiforas del ngenen xil. <sup>20</sup>Erastas dat e ut Korin, e naling Toropimas e ut Milaetas vengán temesei. <sup>21</sup>Usak pisi utemanon umei vengán an tesa xil di bemei. Epulas, Pudens, Laenus e Klodia, del tua sav xil mun inggak, labit bos makoe minuk.

<sup>22</sup>Nasis tengán Hi iti minuk, Timoti, e eheien hos nan iti mi xamim vus.